



空同集卷第十二

五言古詩四十四首

贈王康邊何四子

北郡李夢陽撰

縣縣遠道積冉冉歲華晏
 冰霜夕轉嚴星斗夜仍爛
 蘭缸照寒戶旅士懷鄉縣
 方幸厠鱗詎謂各分散
 岐路忽在茲山川復悠緬
 王子萬人特英論薄煙漢
 康生千里足邁景速流電
 瑰瑋欽奉常秀朗推中翰
 冲標汎光蕙逸思凌玄鴈
 所嗟異根株逝矣悲霜霰
 興言念睽晤佳期阻權宴

九子詠九首

序曰九子者皆天下賢豪人也今乃合余於孟
氏之堂祖行也慕義傷離悵然有感於前遊於
是作九子之詠

劉戶部遠夫 大謨

遠夫振英駕乃自儀封里孟復既鷹奮秉衡亦颺起
獻賦擬楊雄彈鋏笑馮子時異各睽隔蓬轉自茲始

王戶部邃伯 經

矯矯王邃伯深心托玄素豈謂萬里空見此天馬步
獨行迂流議苦志涉煩務曰余駑鈍姿倘辱導前路

王職方錦夫 尚綱

職方昔垂髫邂逅在梁汝遊關匪豹隱攀邵遂鸞翥

鴻詞振苑洛一一中音呂訪戴諒不惜縱鳧非所許

穆檢討伯潛 孔暉

清廟播芳嘆朱鷺激潛調沉冥會詮理刻苦光逾耀

注易在今茲醴酒企餘照載吟古離詠寒拙慚賡紹

馬給事中敬臣 卿

敬臣閨闈彥處世恒自拘朝謁金馬門暮向青瑣趨
朝隱慕方朔修辭劇相如太阿不在掌非君獨嗟吁

陶行人良伯 驥

陶子三泖英妙小富篇翰至響本無聲隱璞疇能辨
運甓不云苦漉酒聊自玩解龜幸心許傾蓋荷清讌

馬進士君卿 錄

君卿素所昧密意宛相向醉酒似馬周讀書薄劉向
時人固不識古志益骯髒試覩同遊子魄礪盡英行

戴進士仲鵠

冠

南州實才窟小戴亦橫鶩探鏹乃叨竊對孔豈在屢
左右佩采薺追趨信陽步傾城在夙昔贈我陸機賦

孟行人望之

洋

孟生瑚璉器英邁徵古篇登泰夙所期望洋豈徒然
欽趨瞠顏後抗志耻盧先吾方把任釣倘借襄陽編

贈姚貞外二首

高鳥厭羣飛孤雲怕自輝綢繆誠靡垂何必久要期
傾蓋有芳訊白首則見疑嶄嶄龍沙濱風波暫徘徊

二

零濛不澤物衝風夕曾波送歸念維楫眇言望江河
鴻逝摩九天蕭艾被泉阿長壽蝕孤嶼峙此將如何

別諸生漢口

大江流浩浩五日與子期風潮變且暮六日達漢湄
人心重攸愛酬德視其施伊茲匪不幸所急非睽離
晨飈望我帆夕也宿共涯浮月每皓皓逆雲遞逶迤
情淵分有窮愴子當分乖昔爲同池萍今向東西開
大別峙崑崑林蟬暮何哀俛首前逝波倚艫各徘徊

贈張含二首

已巖蓬池駕遽返夷門歇商風動榮草簷雨鳴不絕

客病良易積况值變華節悠悠城西館倏爾雙經月
昔至體流汗莎雞傍戶聒子也苟寧志川廣豈難越
流光逝忽忽天地一何軋六月子來至月也今已八
客子悲遠道時氣侵肅殺豈不念爾單室邇泥路滑
三日兩賡歌一日一通札寂軒倚衰柳柰此夕鳴蜩
父母不下堂歸軫何時轄

送張舍還金齒

百憂強自排感之輒復積亦知別心苦所柰懽愛客
迢迢西南夷嘆子此行役出雲懷舊山倦鳥厲歸翮
時情苟靡遭勉合亮奚益還道尚云遠去去加餐飯

酬提學陝西朱君以巡歷諸什見寄

煌煌百二宅懷里念前都孰無雍門哀恨役久長途
登賦時有望所苦言辭鹿自蒙新什惠披玩忘晨晡
疏越發潛響爛若湍錦舒慙亦作者末欲畫安我愚
瀏瀏回中吟宛遊秦隴隅清渭韻泱泱南山筆巍如
誰云篇目寡已包千里餘讀既搖我心倘附西飛鳧
酬秦子百泉之招人事羈滯頗興延阻之嘆

五首

暑阻慮難周絃促調不緩風雩徒情嘆濯熱爲誰纂
昨在泉上期結念在晨晚折花信延佇欲往心莫展

心展會有時跡垂難重期自我別林岑倏焉周二暮
物靈賞不延神往情詎移想像北池遊回繞驚南漪

三

南漪亂渚烟北池美清蓮芙蓉發錦苞白石響澗泉
慮澄美莫致景入情更牽攀英蓮來迹倚壑悵周旋

四

周旋懽莫同回策入雲峯陽崖巨積雪六月如嚴冬
若人竟何乘孤遊邈難從倘遇仙潭鯉露我躡雲蹤

五

躡蹤誠靡尋行瞻勞我心高高望雲霓橫絕天中岑
遊泉嘆昔女隔阻匪作今投桃遺來使倘惠瓊華音

將赴南邑借丘長公巾車

北遊情未斂初吉復南騫積疴畏登涉但焉憚修路
控銜力不任執綏性有慕願蹈高賢轍懼在邯鄲步
諒茲無憾心庶慰車中顧

襄陽篇奉寄同知李公

晨登大梁城南望襄陽郭漢流趨何急樊山氣參錯
樹高風來集道大惟淹泊投沙理雖迫召賈恩非薄
幸且便山郡聊遊謝羈縛仰攀躡孤岫俯眺聆大壑
寒江斂夕霽遠岩映林薄習池宴山簡英寮敞翠幙
偶同携葛強飛翰凌觴酌歸聞銅鞮唱行和峴山作
覽跡驗物理觸嘆徒今昨沉憂亮無益流坎任所託

寄題隴州閻氏林亭

出處信不易卜築豈在遠聞君壯年日頗此遂仰偃
創基倚北阜開牕面層巘雜樹莽蒼蔚長流激清淺
跡異願不隔路阻日遂晚愉悅各殊趣幽意不建顯
春風翻深谷裊裊葛葉展代耕與灌園垂老付所遣
送張六還京口

雲黃風色歎送子逾修畛野風吹江樹波水清且緊
歸舟本自驚况值順流穩金山會當聚別暫情可忍
送裴生京師

大江積風雨騎陰久我仇懷役念戈及潢潦憂中疇
戚戚感物慮况子行遠遊鬱武朝宗心殷勤眺風洲

贈鄭淳

路懸家室怨久別誰奈苦荏苒及春孟冰消舟莫阻
臨觴嘆河邁指景趨前侶汀曲帆易隱勞心望徒佇

贈李僉事衢

處世寡諧合營道無貞心緬邈伯牙絃嘆息誰爲音
竊祿匪我志隨風豈能任所以棄朱紱窮年臥空林
君子枉榮顧駟馬一何駸輕蓋蔭白日軒車匝庭陰
宴晤及春期列筵享同襟目快淑氣草耳聆悅時禽
肴至弗徒歸觴舉恨不深末路校通塞鑿止無飛沉
託意誠匪殊在遠固宜欽願言附松蘿子其斷堅金
將赴江西寄別殷伊陽明府

引年豈必老求志不在奇曰余逾壯齡遭斥還山棲
事與北門合跡擬東陵齊滅音謝人徒四暑忽違茲
向平果遺榮謝安終徇時詎意值嘉運末照及葵藜
簡書下我廬急遽誰得辭迢迢江西帆別當首夏期
束裝逐流潮改服團炎颺情鬱爲念故寄重慚余卑
虞絃改自調孔鐸湮誰持江漢誠暫浮匡廬寧久羈
返貞意已堅抒懷告心知

鳶山訪汪氏因贈

昨余發弋邑急霰舞鳴湍灘高果莫汧改騎凌層山
山層水復曲歲晏嵐風寒捫蘿冒嶮艱踏冰涉洄沿
日入達平夷倏覲君子關清溪交遠坳高松夾路間

遺榮靡所希時仕義乃詮未羨焚魚高頗欽竒字傳
矧伊連枝芬慰我同心蘭繆綢促宴筵曙猿響南巒
冬日撫州贈友

晨光鬱將布時嚴氣自懍陽也諒匪力厥陰無亦甚
時極理終固情成勢難寢徒然江漢紀莫制北飈凜
寒湍落孔家霜色峻石廩甘菊冬始華赤樹紛如錦
校閱纔及旬勞拙遺安枕旣已阻携玩胡由接芳衽
擬峴行共陟寄言備醇飲

內弟玉園庄歸

逾年始及村日入復言歸言歸亦何爲景異情難持
沙禽噉噉鳴園林收暮霏暮霏轉急湍春草碧漫漫

我行已逾堤我心念猶攢志往物不隔室遠詎無端
誠乏靜者慮郊野豈徒安

內弟左國玉挽歌

滔滔水東逝靡靡日西馳日馳雖更晨水逝無還期
清醕滿華尊鳴琴在旁茲門堂不改故若人竟何之
天枉獨兼今凝澄究若斯二紀罔自保千秋寧詎知
情慟道與結感往志彌悲皇皇徂暑月捐我就郊岐
故築即新墳廣路席前基狐兔夕向啼芳麻延碧滋
解鉢心已許回轅痛豈欺永測游魂理徒此眩盈虧
改營外舅大夫園域
貴賤無二死賢愚同一丘明公昔謝世跡駭理夷猶

夷猶及茲年墓木拱已稠志決物可贊運旋情更酬
悽悽臨壙穴崩迫覽陰幽昔爲美丈夫今與腐者儔
枯骨蔓草纏劍珮攢虻蚍蟬痛沉祗愈迷神期竟何遊
名崇壽罔積露墮蕙先秋芳塵滿華屋故馬咆行駟
改園僅逾阡穿地即我謀方期粉櫝成庶紆生者憂
爲惟國士遇因慟遂成謳

熊御史卓墓感述

幽幽山下江峩峩山上松纍纍松下墓瑟瑟松上風
慨昔與君遊並遊京華中我冠省臺內鳴鑿趨步同
中更嘆莫偕永逝當何逢絕絃已易慘挂劍今誰從
駕舟亂回洋展墓臨高崇浮雲駭南流顧望摧我衷

德音既長已情感胡由通祗餘泣麟意悲歌傷命窮

徐子墓

晨興駕我車行行造古墓墓門一何寥踟躕久延顧
白阡修且直青松夾中路借言葬者誰漢時徐孺子
麟出諒不偶龍潛竟何以峩峩東都會藹藹青雲士
一鳴爭及時邁跡歆先軌冠蓋紛若雲車馬闐京里
鳴玉氣自振排闥情難已鴻鐘有競勳大策無停紀
斯人獨岑寂哀嘆勞心理

溫太真墓

雙鶩識妖端一馬前休兆中原既板蕩臣主同奔峭
長蛇恣吞噬白日掩孤曜心違祖逖楫事躓扶風嘯

康屯見斯人辱已存機要建侯竟誰功江介無飛旄
勳成身乃殂天逝徒心悼側惟盈縮理虛咎燃犀照
遺墳闕清千古樹寒新廟來阡莽廻鬱弭節紛延眺
載瞻徐墓邇益壯風流紹

澹臺滅明墓

子游昔宰邑邑有澹臺公非公不見宰不徑垂無窮
身歿埋豫章豫章乃城中長松何寥寥石墓堅且崇
崩館晝常陰古樹多悲風丸丸擁基藤垂垂網戶虫
喧寂本異感慨惋當何同道伸固難滅瞻睇搖晴虹

孺子墓夏謁

懷賢意實勤展謁良已屢丰茸蔓草盛間闕夏禽嘯

野斂延竹戶丹華綴高樹徘徊想故榻留連果誰遇

孔廟松

夫子廟前松童童一青蓋盤擎若蒼龍借問自何代
靈籟度笙竽古色積烟黛森然森翠中鬱彼風雲會
絕勝講壇杏應並闕里檜

犬詩二首

警夜力不贍逐兔非所任吠花春院閉戲草日移陰
家貧稱戀主時乖堅始心

二

吠厖聞昔詠走盧欽故名遊園方載獫重鉞寧自行
發踪難可遇霑草空含情

詠信州茗和鄭子

厥草有佳種靈味固無匹豐內謝華幹卑叢類謙抑
陽和散林彩修修吐英特濯影金屑泉敷芬玉巖側
完馨重伊始溥露浥其色采掇屈柔腕製之成我德
三緘附貢品遂入君子食入鼎沸銀浪隨風可傾國
滌煩古有經通仙詎堪惑

空同集卷第十二

空同集卷第十三

北郡李夢陽撰

五言古詩四十七首

余懷百門山水尚矣頗有移家之志交春氣
熙忻焉獨往述情遣抱四詠遂成示同好數
子

魯連蹈東海介子逃西山方舟信超越巖徑安可攀
揚烈猶靡懲置金徒嗟嘆伊余秉拙訥薄遊及茲年
急湍有奔桴迫路無停轅慘慘滄流月悽悽沙塞烟
徒欽靜者意未遂同袍言偶耕慕龐公岩棲景焦先
捫衷諒有持顧已竟誰諉復來感方寂解作憂更牽

抑心二十載始別金門還積疴謝人徒頗與疎逖便
眷茲丘園榮豈羨塲苗篇

二

浮海傷固窮逾河嘆誠邁濯纓萬里流高視九州外
功成奔運徂氣至流飈代淒淒秋柯零冉冉春條媚
周覽倦河壖孤悰冀岩瀨道以沉寂超賞與崇深會
豈惟超遠情亦因謝塵籟聿想山中人風吹女蘿帶
折麻凌險岫采秀越森蒼眷彌志終申獨往竟誰礙
亭亭太行峯堯堯百門對抗手別故權乘雲弄烟壑

三

閱圖訪名竒久欽蘇門山危峯羅縣牖積石噴鳴泉

情吟激衛女嘉遜招古賢出遊結夢想神往理誰詮
連岩旣鬱紆廻渚復緜芊猿吟曙霏豁鴈泊暝陰還
杖策躡丰茸解裾濯潺湲仰視遊雲翮俯察戲藻鮮
覽物慨幽存撫化懷冥筮况逢春華交更此眺孤烟
畢婚非達生一嘯復何言

四

山客戒明發朋故來攀留岩潭窈叵測險徑增離憂
曰余負幽僻誦古歆遠遊陟懷康樂屐浮羨鴟夷舟
探討傾子長浪迹多阮侯若人不可作瑤草竟何酬
事往悲易深情存道難侔以此激孤詠喟焉睇滄洲
安波有覆艦坦路無全輶危虞豈在岌薄劣終見尤

願附綠蘿緣永與棲者儔

自大過渡河趨陂沙岡

凌春遠行邁游目恣沿越漸辨林中曙遽失霞上月
觸物誰爲情悲嘆曷可歇載登隋疆場况眺宋城闕
陽坡散初柳陰曲峙寒雪只此判氣候豈必殊燕粵
泚泚濁河駛戛戛晨風發揚帆截驚瀨倚棹望窮髮
鳧鴈眇難即汀蘭翠堪結美人既莫期天路復幽絕
陂岡鬱參錯岸沙皓明滅日暮孤雲興何以慰忡惓
陽武詠懷陳平張蒼遂及博浪之事

玉璽戒不力金鏡淪無光大人既龍興烈夫亦鷹揚
伊人各乘時矯若孤雲翔韓稚豈在屢秦氣日以喪

六奇佐揮戈五運開靈昌時來屠沽奮跡往英雄傷
平生冀風期况乃逾故疆灑淚越修垆含凄溯河梁
古墳密嵯嶢春沙鬱茫茫徒瞻松柏路詎申椒蕙芳
遺榮竟何尤任智終自戕羨彼赤松遊援筆即此章
覽遊百泉乃遂登麓眺望二首

東髮懷幽奇覽籍冀有遇來登百門泉果協佳勝趣
毵毵圓波躡藹藹浮陽聚止坎渟泓冽激石迅湍注
昔聞滄浪濯今解川上喻豈惟傷衛歌兼以發蒙慮
况值春序中群物已改故菰蒲冒清深鱗介各有慕
行羨浴者鳧靜對栖雲鷺巖石霏空潭影林藹變朝暮
極目北上帆朝宗感游寓

發鞍憇林木杖策陟徑峴巖連嶺參錯洲曲岸迴轉
白日麗蘭薄原綠靜如洗嘯臺既清峻行窩更幽緬
慨念昔時人瞻望淚已泫薜荔夕搖曳蘿徑復誰踐
碑板半磨滅石門積苔蘚代異道豈隔事邁迹空顯
獨采石間秀眷此何由展逝鵠無卑音潛蚪厭汗淺
曠哉古今意難與世人辯

登大梁故城

登高與處卑由來慮多端登高尚寡悰處卑焉能懽
以茲歷荆榛褰衣躡嶮岨土壤帶陰風樓櫓危急湍
岩岸苦崩奔葭葦何漫漫周望鮮故物俯察多憂嘆
潛魚茸其鱗驚鳥無停翰雲浮誠不任淵沉諒何難
終附岩穴棲斯地非我安

德安趨潯陽

始征晨風息雲流日色展登陸艱且澁厲澗一何緬
維時仲秋交颺颺林飈卷綠竹垂我車丹花映行幘
冒巒維有松繡石盡成蘚攀牽雖多悅巨頓乃勞倦
日中迫廬岳蹊徑愈回蹇雲湧連遙嶠雨暗失近巘
奔崩萬壑會嶺絕一徑轉遽訝川梁沒幸遇石瀨淺
道以習坎利用待既濟顯介石諒益固巨川豈遂眩
誰哉能豫謀隨寓斯可遣

宿圓通寺

曉發蒲亭邑暮投石耳峰僕夫困露濡山雨猶響松
茲壑况采阻顧望惟溟濛幽岩託層房豁然臨猴江
竹修苞北基巖峭垂南窻俯觀梟戶蘿仰聆走簷淙
挹此暫足遣遐想情難降陶公有遺墳黃子留孤踪
通止良固殊羈縛誰爲棕坐聞吟猿暝祗今歸思忡

釣臺亭成

颯颯風瀾瀉纍纍山石峻上構倚岑削簷楹闕奔迅
俯之纜一壑仰面已千仞訝游竟日夕載色披英俊
故杉改新蔭魴鯉况充牣本輕任公釣詎慕庖丁刃
素飈裊延蔓商氣斂芳潤臨深悟邃奧覩逝識大順
却笑矜名子羨魚一何吝

臥龍潭

出遊青天澗遂至臥龍潭重岑上無極白日蔽寒嵐
巉峭詎能步嶮絕誰可探歷石誠巍倨捫壑驚舒豁
我行值秋季霜蟲搖匡南午攀日忽夕足倦情逾酣
雷瀑響岩澗孤花媚澄渥撫似悟命意循跡想名庵
庵廢人踪絕岩剝文半滅世異坦道塞慨茲忍能說
白鹿洞徧覽名跡

情高忽凌厲步履輕巉緬葛弱亦須捫崖滑每獨踐
涉清愛重屢探阻遺驚眩始茲陟五峯遂憩松下巘
岩桂紛始華石耳翠可卷追想白鹿跡伊人竟何遣
觸端緒自縈薜荔况在眼慨嘆意莫置顧望日已晚

夕湖浴岑峭流光滅蘭坂命酒寫幽獨鳴琴且游衍
始至白鹿洞
曠哉超世志緬邈平生思鬱壹眷名跡久注匡山陲
南涉枉嘉命果諧夙所期仲秋岩壑清宮館復在茲
白石激寒湍岩蘿裊空基黯傷逝者往密慚來者追
性同道豈隔途異理空悲興言懷昔賢日竟眺前岐
榛荒徒鬱紆林菴一何采感情匪哀嘆聊詠昭言垂

陟嶠

伊昔謝銜歸志頗諧綸釣甘追河上跡切慕蓬池嘯
孰知紫芝慮竟荷青雲耀值秋歷江郡弭節登廬嶠
沉深九疊秀峻極千峰峭錦繡亂岑嶸晨夕改觀眺

晶晶游氣斂皜皜寒日曜飛瀑信雷邁奔峽還龍躍
耽遊遽忘歸久住輕時諄天池絕亦捫石鏡坂可照
矧茲二三子芬馥含清妙霜嵐澄西夕從歌傲希調

廬山秋夕

山壑寒氣早日夕風色緊火流桂將歇霜至蕙草墮
蟋蟀集澗館禾委被疆畛物感憂自攢排遣情詎忍
年徂身與衰時棄世所哂躊躇夜不寐起坐萬念軫
崖傾月西流嶂曙松猶隱敷敷露猿啼行行采芳菌

落星石

千江勢欲倒蠡門支孤嶼輝輝雲崖映洶洶湍瀨柱
霜水落丈餘石角露齟齬探竒犯嶽涉停旄挈賢侶

寒裳入松寺倚竹切風渚崩奔亂帆下散曳波鳥舉
秋空澹明澄浮山互吞吐靈根合道蘊曠蕩豁福阻
貞靡亞砥柱險可並灑瀕不聞來嘉勝祇因謝公許

泛左蠡

辭山意不悅水泛暫可樂微風逗帆席日竟展光耀
揚歌蕩溟昧鼓柁極窈窕指顧異晨暮俯仰改觀眺
出沒湖中山明滅海上嶠素輕左蠡險今覬石壁峭
謝屐久已蕪陶磯寂誰釣解吟松門詠令人發悲嘯
騎登謝址復舟觀于石壁

奮鵠有奇翰古鐸無追響游雲跡易滅嗚世情難想
昔吟瞻眺詠今覲湖中賞松門既岑峙川水深以廣

昏旦候自變伊人竟焉往岩剗徒空嵌堂基鞠爲莽
扉徑不可識悲愉異今曩石壁屹寒岸崑崖嘯魍魎
攬馭意已極登舟祗彌惆抱茲久延佇遵渚路回枉

南岩寺

岩高屯屋巨谷邃至跡罕仰之訝天缺登頓徒雲滿
木零鶻巢露松冷猿嘯緩一滴聆不厭五級曩可踐

赴懷玉山作

始臨清溪寺不謂茲路艱崎嶇踰南嶺轉見山鬱盤
重陰起北谷凍雨響前巒志定邁孰禦勇往竟孤攀
挽葛接懸紈架木凌飛湍律律岩壑變颯颯嵐風寒
隔港望絕岫峯峯已雲端

至懷玉山會起書院

冒險登雲峰雲湧風不卷淒淒松霰響濡濡竹露泣
沾塗意已困觀構色頗展故堂改顏制新築負幽巖
伐材但旁谷礮石况非遠清渠激修溜巔畝曠以衍
偶至若期遇天定固良鮮仰止古有訓靜成力可挽
祇虞遊業子捷徑爲世堯

薛家樓宴

閑遊北城隅俯視清江郭洪川帶名都形勢自相錯
樓觀藹鬱鬱街巷紛以漠北城良已高况陟城上閣
輕裳拂倒景飛檻聆天樂夕山一何蒼夏潦彌井絡
衝風激回流玄雲駭難泊暗觀逝者危遂悟居者樂

慷慨亮易感捫心果誰惡夷險非我爲彈劍且盡酌

曲江亭閣

纜舟金華潭遂陟岡上閣蹊徑阻紆鬱岩水光參錯
夏林一何清餘雨浙未落高覽景自異况值晚霽廓
夕日明錦湍歸雲擁華薄近山聿蒼翠遠嶺復岑崿
曠蕩感遇寓俛仰嘆今昨不見往者悲祇覲來者樂
顧瞻大江流愈恨代謝速源湧竟誰禦謙守諒能曲
所貴遺榮名覩義願有勗

發豐城屬江漲風便

午晴發豐邑挂席遡修瀨潮起果諧志風助利擊汰
棹歌落日上游目波嶠外巨川信易涉貞固乃宜戒

武陽抵進賢

大宇流玄化生情互陰朗積霖夜猶注寒陽朝遽上
肅肅晦色斂晶晶川水廣楓林一何赤沙嶼鴻競往
涉河歷紆鬱登嶺暫停鞅撫江信縈帶鐘陵氣弘敞
荆俗雜澆厚徵賦則邦壤佩刀豈民性剪戮嘆幽枉
自南康往廣信完卷述懷十首

越旬不出門所值疑初覲長湖迄華岳融景遞澄秀
鼓枻聿行邁覽物每欣邁飄飄順帆風透遲斂雲晝
鳴鶴矯豐田文魚駛閑溜有生孰靡適時及異榮疚
彼哉吾豈仇乘運視所受履茲良已快迺餘足云究

二

迅風會高雲逝逝曷能已朝從冠劍馳夕暮遭纍繫
榮辱邈何因嘅嘅昧成理湖程莽復闊灘溜平春駛
肅肅東驚帆晨夜不得止仰睇啼柯猿俛傷躍清鯉
一言季布召斥以一言毀從古誰靡然寄語求金子

三

金閣簡英儒玉書托紀綱絲言一何諄黜佞掄圭璋
澄清有夙愫攬轡誠慨慷聿茲歷三始矢志千載芳
風波駭非意多口亂否臧九閭眇以玄欲扣六翮傷
所司專愛憎威刑喪厥常彼方聳輕蓋寧知嗟道傍

四

淵雲諒殊性予豈經世儔馳驅二十祀學宦寡諧謀

昔斤還三河誓言永林丘靡堅今咎誰畜志竟莫酬
在難歸貽阻眇焉悔前修陟崇望波嶺翔雲駭西流
春羽振桑榆念之心形仇東徂嘆伊始懷哉俾無尤

五

朝離傍羅浦東至龍潭宿戢柵候明發獨寤守空曲
宵晝有常理欲往不獲速多慮良攪眠強置復攢觸
起立萬動寂湍響應鳴谷驚風臨岸激高月散春木
絮雲吐岑岫玉繩低以屬慨哉復奚道徘徊至天旭

六

一氣噫太虛吹萬良不同伊余就幽役春序奄巳中
芳辰下霜電寒暄乖故風北柯沮靡榮南林曷由豐

臨門翳孤松悠悠慨初終張儀相六廷虞氏哭途窮
首陽乏長薇洛都鞍馬雄天定俟何時詠言摧深衷

七

雲和易成霖羲陽一何冥淹哉沮如區佳日閉我扃
覆瓦僅蔽牀頽壁支數櫺淒飈驚中帷電霰時復零
天道有常乖萬殊誰竟寧子期久已徂縱陳孰爲聽
當道有豺狼瑣言昆言螟蛉習坎固終利從茲倣無形

八

靜居百慮屏孤樹迺牆隅奄茲華葉更搔首睇淹如
時雲布靈谷天今震高衢霖潦灌百川萬壑寡安魚
東京構黨禍郭子逝于于伊匪三顧勤孰崛南陽廬

京燠非力排裘葛從所須龍蛇翳厥身孔贊寧我諛

九

赦者小人幸臣誠小人儕匪圖軒蓋榮山海有奇懷
禮法無復拘評者靡我排思夙慕華貴振鞅登要塗
烜赫豈不快寤寐憂所乖識幾既不早今戀非鄙哉
乘桴越洋濤采蘭及春滋于焉可佳客龐叟心所期

十

一夕復一辰倏忽春務易雲葉布豐林蚯蚓盤我壁
田竇仇片言厥怒一何赫笑謔有白刃千載乃露跡
倦茲掩陳記出戶睇高翮積讟聆民誣欲采不可譯
英驂振飛軻出入勢輝奕哀哉彼何子躊躇祗沾臆

廣獄成還南昌候了十首

一淹經六旬揚舲復焉極腕然雖靡由事事嘉可即
依依春功奏朗朗維夏逼故茲波與嶺觸目異前昔
逸雲散歸雨川水浩崩溢挂帆趁風溜覽岬湊悲懌
昨猶且中免今爲頑林翼邈言念先古展矣我心獲

二

直木防見伐茲言豈我欺若華耀四海孤邈疇見知
莊鷗運池溟舉翼九天垂風積苟不厚中路將安期
嘆息竟何語俛視川波馳溢霖鷺洪濤千載固厥時
燕石一何珍有驥不自持野飈激靈襟逝言惋長岐

三

時至鮮枯林朱蘭被長坂臨嶠覲賢跡停楫暫遊衍
靈雨吐葛花相葉已復展佳哉溪上邑流峙亘而緬
岑岑徐巖秀飛泉洒丹巘若亭交景風裾帶時自卷
居高乃慮孤涉歷悟攸遣枚枚三陸宮千秋竟茲顯

四

餘干濱巨湖厥土曠以浮津驛暮何囂避之泊南丘
遣子省其母析擢詣江州明星波洄洄欲發仍復留
有端肇絲微涓涓遂成流拊心實罔慚患來誰誠謀
紛綸及今茲事已遙尚憂志士常苦貧饑渴無我尤

五

昔遊東山日覽七臺肇新宮徐令實經營絃誦溢其中

閱茲奄三年離滯心莫同我舟非不維奈此西逝風
乃予胡德余干邁遠從公朝旦發龍津暮棲依瑞洪
湖山沒如拳波途浩難窮佇瞻有深懷貽誣勒堅崇

六

夕棲瑞洪渚遙覽渚北山相傳洪崖子乘雲自此問
履跡今尚存其人邈莫攀粵余登征途頻年涉間關
毀譽一嬰心寤言多所嘆於茲誠踟躕振衣躡前巒
泮水莽浩浩驚風蕩回川欲濟惜無梁飈輪儻中還

七

登艦脩五日覽接漸增闊洶洶北注川瀏瀏得縱壑
劇哉風水慮履順故靡豁高鳥厭塵集智士貴處末

交甫懷漢濱婉孌情遽奪結駟匪不侈險至誰克過
沉身厥亦罕萬世惜不脫遙遙哀雲岑瑤草爛孰掇
八
明晦每無常人道豈不然歸雲徂靡餘日華耀清連
戚愉緊爲誰喟然想千年姑蘇寵宰嚭越孤辭會山
梅將輔番君范子逝不還乖歲君子貧枉尋矜大賢
時霖潤萬物猶蕙乃同妍東門可棲遲歸歟聿奚言

九

陽鳥逝無餘觀者鷺與鳧青青澤淑毛刈之糞誰畚
經過問當年云茲夙屬吳歸命喪厥儀長雲奄西徂
撫牀竟空言金陵乃以都桓侯威八州溫氏闡雄圖

聆言愴我衷徬徨感終初混一今其時舟騁非爾虞
十

仲冬別豫章涉夏茲復臨涼燠殊厥時能不摧我襟
樓觀蔽泰清衆木凄以陰倚橈陟龍沙優游眺洪深
魚鼈潰驚流瀾駭遂至今中有風縱鳧振翼回哀吟
波阻杳莫即馳景忽西沉抗手自茲辭萬世懷飄音

德祖始創

空同集卷第十三

燕田杳莫明

魚鱗貴

對躡蕭恭肅

中冬限新章

十

領言會非東

空同集卷第十四

北郡李夢陽撰

五言古詩四十首

禘祭頌述

弘治十八年歲除日作是時武宗初即位

嗚呼大聖人肇迹或漁樵蒼龍戢其角志固無丹青

德祖始側微濬葉開皇朝禮蓋視后稷面南統羣

昭大哉九廟儀親盡敢不桃再遷及皇熙世室闕

以寥袷辰復來集鳳皇鳴簫韶惟皇率百辟孔祀

自今朝白日照寶旂御氣如絳綃將將磬筦鳴颯颯

靈旗飄恍惚帝醉飽諸王亦飄颻下有開國勳偃蹇

羅金貂愚臣叨對越精魄爲之搖鼓鐘送羣公玉戶
風蕭蕭唐侯昔踐位十八號神堯 皇實秉敦默龍
性無逍遙道合天人際志與神明超降祉倘冥漠四
海無征徭

清廟篇

巖廊肅文欽芳區恣幽騁寬糾豈異性拘曠本殊境
嶽岑路寢東森疎嘉樹靜珍叢媚朱夏秀幹揚修景
曳裾羣彥集柱笏萬慮屏仰望南城苑飛除帶崇嶺
巋崕白玉閣要眇黃金井季主節觀眺哲王擯遊幸
自非淵聖姿誰保天步永

丙寅元日朝退有作

赫赫大明朝皇皇啓八葉諒闇在冲齡憂勤績洪業
真人改革殊屢覩禎祥協春王肇元載萬國咸臣妾
端冕御茲辰縹緲仙雲接神飈翊紫蓋翔龍舞浩劫
哲后畏天威惕若春冰涉古編昭日星有躡尚可躡
大哉五始義允矣三陽浹

從軍四首

漢虜互勝負邊塞無休兵壯丁戰盡死次選中男行
白日隱磧戍胡沙慘不驚交加白骨堆年年青草生
開疆勳未已召募何多名蕭蕭千里烟狼虎莽縱橫
哀哉良家子行者常吞聲

從軍日已遠備茲途路艱驅車太行道北度鴈門關
天寒雨雪凍指墮曾冰間登高望虜境白沙浩漫漫
單于數百騎飄颻獵西山殺我烏玉弓赫然熱肺肝
安得奮長劍一繫名王還

三

別家亦云久昨得家中書書中何所云父母與妻孥
昔來柳依依素雪今載塗豈不念還歸天子西擊胡
登山眺故鄉存沒兩嗚呼丈夫死國讐安能戀里閭
生當取封侯怨別祇區區

四

久處行伍間漸知苦樂情能蟠丈八鎗徒御不我輕
府帖昨夜下燒荒有我名秣馬待天曙肅肅寒霜零
左韃插雕羽雄劍躍且鳴日高渡黃河東過受降城
所羨在滅胡富貴何足榮

屯田二首

葉落歸故根孤雲有時還凶年閭里盡誰門今幸全
全者自何歸皮膚半不完百租叢其身欲訴誰見憐
吾家十八軍獨我猶從戰昨當戰交河左髀貫雙箭
本不識犁鋤况復千畝租三許吏不語鎖頸投囹圄

二

日落蒼天昏奔馳吏下屯揚言科打使論丁不論門
老軍出聽卯老婦吞聲言邊城寡機杼耕種育兒孫

誅求餘粒盡竭力
豢孤豚昨當總管來
宰割充盤餐
言既復長號
吏去收他村

塞上雜詩二首

邊烽日夜至
飛符來會兵
羊牛入高砦
雞犬皆震驚
壯士按劍起
鞍馬若流星
鎗急萬人靡
笑上受降城
生繫五單于
歸來獻天庭

二

胡兒追野馬
迸蹄若驚鴻
一馬帶雙箭
墮我邊壕中
敢望不敢近
踟躕各按弓
抽身復北去
天寒沙磧風

功德寺

宣宗昔行幸
遊戲玉泉傍
立宇表巖嶠
開池荷芡香

波樓遞感杳
風松奏笙簧
百靈具來朝
落日錦帆張
萬乘雷震動
千岩滅流光
綺繡錯展轉
翠旗杳低昂
法眷撞鐘鼓
宮女拭御妝
笙鏞沸兩序
星斗宿岩廊
至尊奉太后
國事付三揚
六軍各宴眠
百官守舊章
巡非瑤水遠
跡豈玉臺荒
嗚呼百年來
回首一慨傷
鳳騰赤霄暮
龍歸竟茫茫
山風撼網戶
紫殿生夜霜
退朝值休沐
我行暫翱翔
娟娟登岸林
慘慘度石梁
廢道哀湍寫
松柏間成行
啓鑰肅覽歷
過位增悲涼
積久灑掃缺
乳鴿鳴膳堂
舊時琉璃井
倒樹如人長
神已佐上帝
教猶托空王
鈴磬颯鳴戛
晨昏禮相將
盤遊非聖理
操縱在先皇
至今朝廷上
不改舊紀綱

翠華巖

洞劓耶律詞其名翠華巖俯視聳觀閣仰面攢松杉
厥維何王代鬼斧開嶄岩精氣久削薄烟嵐鬱相攪
屢憇驗足爾獨往悲情凡入蘿畏石墜轉嶠驚日銜
飄飄萬里風吹我秋衣衫放迹慕康樂入道懷賀監
載思武陵避愈悵桃花岳去住亦由人極目江上帆

望湖亭

來登望湖亭始盡覽歷妙布席倚岫嵌波望領佳要
山花落天鏡鉤簾巨魚躍巖潭遞隱見圓浪浴奔峭
岬嶽百萬閣日落展光耀羈縛阻延放臨淵羨孤釣
霜寒葭菼白沙晚鷓鴣叫吾非阮生倫於此亦長嘯

呂公洞

厓根豁一門恠石相撐拄豁舒自吞呷白晝亦風雨
陰處汎清泉積苔蔭鍾乳往聞茅山勝夙慕華陽主
路遐限孤往倏歷十寒暑經亘騁心目小憇借道侶
茲洞雖入境固足託茅宇惕然忽內咎我何戀簪組

香山寺

萬山突而止兩崖南北抱鑿翠置殿榭級石上穹昊
高卑各稱妙曲盡結構巧有泉如線縷盤轉出松杪
嗜竒忘登頓緣危肆探討險絕逼牛斗蕭颯若風島
夜宿來青軒天色碧可掃湖沙靜莽莽海月白皓皓
想當邦邑初此地只蒿草綺麗乞誰鑿巖壑爛相裊

但看全盛時民力爲茲槁

平坡寺

西山萬佛宇爛若舒錦繡平坡憑風迥突出衆山石
宮閣因巖切面勢巧相就百里見琉璃巖嶼戴雲構
朋遊探絕迹杪秋歷羣岫得此目力展恍疑出氛囿
仰看北斗逼俯恐東海溜雄壓香山麗閣掩望湖秀
落木響巖牖寒嵐染衣袖延緬古今并佇立悲慨湊
盛葉慮反始危基有傾什千載誰復臨逆想蓬蒿茂

天寧寺觀塔碑

舊瞻天寧塔今覽天寧寺茲塔多鬼恠光芒夜夜至
不知何時殿結構今頽棄剔鮮讀其碑識是隋文季

蚪蚪半剝落蛟龍猶罌我來值時暮攬逝發潛喟
修陸控趙代長山衛燕冀蒼然野眺合一灑楊朱淚

鏡光閣

我生走紛境性意苦不適竭來鏡光遊不覺祇樹夕
鳥藏丹閣暮蕭槭柿葉赤杳如造巖壑闐其寡人迹
其王戴金冠天子之所客逐我蒼苔下坐我紅罽席
落日入虛牖窈窕雲光白團團石蓮燈照耀錦繡壁
忽聞鈴磬發轉悵俗務迫靜躁本殊科利義各有癖
伊余竟何爲奔併阻行役乞君摩尼珠一照幸不惜

媯皇墓詩送喬太常

正德元年上以卽位遣官禮百神

伊聞女希氏奮迹鴻荒日神功義農並吹簧豁陰鬱
鰲極本寓言蛇身竟恍惚遺墓趙城側古廟松杉密
霍嶺峙嶺岍汾川眇蕩瀟穆穆秉德臣蕭蕭奉瞻謁
祈靈沂遐躅明裡備精物天雖積清氣運久恐漏闕
徒煉五色石寥廓詎能越送子顧周道俾我心於邑

三忠祠

憶昔漢諸葛龍起蒼三顧志決竟星隕嘔血爲軍務
鄂國與信國屹屹兩玉柱殺身不救國冤憤水東注
往事勒鐘鼎新廟傍官路慘慘冠劍並凜凜生魂聚
翠旗晚明滅往往鬼神駐懷嘆各不申翻然向烟霧
我征久奔迫過此感傷屢時來展肅藹數馬門前樹

香臺野歛上羅幔虫蟻駐烈士爲吞聲清風激頑懦

良嶽

城北三土丘揭嶨對堤口黃蘆莽瑟瑟疾風鳴衰柳
云是宋家嶽豪盛今頽朽我聞帝王富東京實罕有
鑿池通嵌竇移山媚戶牖岌業樓觀合歛吸風雷走
巖陰翡翠吟海窟蛟鼉吼燕趙矜麗人搜剔克妃后
君臣互沉洎斯道詎能久嗚呼花石費銖鎰盡官取
北風卷黃屋此地竟誰守迢迢五國城二龍回其首
向使任忠良邦國得滅否余來值寒暮悲歌坐林藪
狐狸窺古壘破瓦沒藜莠孤城峙我前蒼蒼日將酉

天馬

天馬從西來汗血何歷歷天子顧之笑置在黃金櫪
嗚呼神駿骨草豆日蕭瑟瘦骼突碑兀銜轡掛在壁
白日涕至地青雲志拋擲朝望竭石津夕盼流沙磧
猶能肆橫行倘君賜鞭策

古意

有鳥何方來哀鳴向西北我欲縛此鳥天路險月棘
悠悠浮雲行照我暮顏色丈夫重幾微男兒死邦國
長鯨一奔逃萬網不可得平生反掌志對此空嘆息
亭亭特生杜道傍皖其實孤桐雖良材棄擲處遐域
而余竟焉往嗚呼淚沾臆

遣興二首

金陵固麗地幽薊亦名城皇天作南邦北斗開瑤京
萬國梯航入宮殿造泰清大哉帝王居海岳自環滎
禹功肇胼胝湯也勤四征煌煌肯構訓聖人垂其情

二

四海爲我土九夷盡來王貢琛至北戶北至玄谷陽
我祖秉天鉞血戰開其疆當時受命佐一一皆忠良
噴薄倚日月萬古瞻騰翔乘運雖有時盛業當自強

歲暮

軒坐意悄悄感此歲年暮一氣有肅殺昊天縱霜露
衰容搖萬物日月立復度赤驥初長成自謂中君御
揚鞭過都市萬馬不敢步天寒草蕭瑟側塞在中路

良辰不再至我髮忽已素不見古賢達盡被名所誤
沉吟惜蟋蟀延佇羨鷗鷺終然托遠適餘者豈足顧

苦熱

伏陰固當奮亢陽乃逾緬嘈嘈蟪蛄鳴樹杪風不展
上天收雷雨萬物沮沾洗推案忽大叫蓐馭何時返
赤日厚地裂揮汗無晨晚古時有虞舜彈琴理驕蹇
軒轅制六律四序無乖舛何當挽二聖吾欲遂仰偃

十五夜

夜陳芳宴會座有離羣友中秋而無月何以慰尊酒
賓主慘不樂周席盡回首向黑明鐙入雲景爛虛牖
尚覲光破滿時問陰薄厚吁哉至精物汝亦蒙此垢

上天悲隔遠人生怨分手月既有開塞吾寧息奔走
霜露棲蔓草疾風下高柳勸君聊盡觴居諸亦何有

十六夜

四海蒸爲雲三夜皆天風他方縱有月不照長安中
長安十二樓戶牖鑿玲瓏貴家金張徒高宴開帟幪
華燭代明月何必光遂通夕露久已晞懽娛良未終
迫塞諒有殊盛衰寧見同悠揚雲中魄既滿還自窮
鬼神惡盈踰天道懷其公

十七夜

幽意竟不愜待月坐沙際久陰固當豁明月忽墮地
桂枝沒半輪蟾兔職業廢姮娥飾粉妝愁絕雲樓闕

鸞憂不解舞竟夕掩孤袂崔嵬黃金闕何由訴天帝
景破力不敵光滿雲仍蔽徬徨步林樾爲爾一流涕

小至

日爲衆陽宗來往成謝代來之生萬物往以告成歲
亭亭羲和駕建此南飛旆雙龍服偃蹇流雲翼其外
和風卷凍霧重陰颯無賴樞知化工幹冥與天意會
大君肅嘉禮君子幸亨邁誰能助新陽爲我激靈籟

贈徐子

偃王世蕪沒石麟亦埋翳徐子發東吳英論有餘地
龍遊滄波阻日出浮雲蔽嗚呼獻玉士竟灑荆山涕
光掩明珠棄寵奪西施廢古來共如此不獨君遭際

余本澹蕩人傾蓋託末契酣歌繼旦暮醉酒無陰霽
各爲征蓬散吾豈匏瓜繫舊時南陽宅回首成迢遞
蹈海有夙期與子自茲逝

七夕遇秦子詠贈

皎皎河漢月照我西南樓七夕遠賓集置酒城東陬
展席對雙星盈盈隔中流豔豔靚妝女欲濟無方舟
神爽即易合茫昧竟難求明明君子德寡妣誰爲仇
豈無采唐約失身良見尤人生信齟齬世事良悠悠
不見古時人皓首猶公侯葵藿不餓死富貴安可謀
願繫場下駒盡我盤中羞我今爲秦聲子也當吳謳
酣歌達清曙臨分贈吳鉤

贈王御史

夕寒風自起集雪耀中宇朗月一何速早已爛芳醕
邂逅我蘭友設尊欵清語連翩忽竟夜悲嘆爲故侶
瑤華雖莫折羽觴時復舉念昔青年日共矯凌風羽
啄食九天步宿必華池渚中路更險艱風波各失所
大明盪妖氛迴光蔭衰腐諸賢旣連茹王子豈羈沮
餘生實自慶追念良已苦掇促廣陵散愴惻山陽旅
事諧終合并感往徒心楚棄置且安寓懽娛弄尊俎
酬伊陽殷明府追憶見寄

弱齡負竒節志欲凌海岳白馬金陵來遊戲宛與洛
出從七貴飲醉調五侯謔妍華不見售讒巧恩愛奪

涼風卷團扇世路隨飛藿謫居宰山邑頗喜占名郭
川嶺鬱森秀烟雲日噴薄况當素秋霽清霜掃天末
龍門旣踈峻伊水復澄豁啓牖眺飛泉據案望岑嶸
獨撫巖中琴遙在汴上作懷賢諒在茲感舊但如昨
徒然佇王鳧未果偕緱鶴終期謝紛袂携手向嵩岳
與殷明府期嵩少諸山不果

旅寓限崩迫騷屑隘煩務向來嵩少約屈指謂旦暮
豈惟攀時彥兼欲展秋步僕夫戒衣糧車馬亦充數
胡然泥行邁遂此嘆乖選峩峩雲中峯阻爾獨何故
佇瞻風嶠突側耳石泉注夜來逍遙夢忽落嵩山樹
纍垂松猿噉澹沲岩姿露存已超彷彿醒若涉顛遽

彼美眇何許茲端愴難屢采蕙忌及晚我疾畏晨露
烟蘿四時佳春服易爲具河陽羣葩發振策冀有遇
酬秦子以曩與杭子并舟別詩見示余覽詞
悲離愴然嬰心匪惟人事乖迺信手二十二
韻無論工拙并寄杭子

憶年二十餘走馬向燕甸縉紳不識憂朝野會清晏
嗜酒見天真憤事獨扼腕出追杭秦徒婉婉美柔翰
探討常夜分得意忘昏旦雪雨亦扣門僕馬頗咨惋
歲蕤香山閣齒峯蓬萊殿登頓窮日力延攬伴壯觀
孔翠不易馴人生本無泮蕭蕭田中蓬隨風各分散
杭生比適越秦子遊瀝澗南北兩文星光芒亘霄漢

余衰更乖謬挂一每漏萬夙遭青門斥差勝黃州竄
偃息於沙澤遊遨傍河岸秦也雖共區累月不一見
秦實困勞冗余亦怕梳盥何況阻疆域杭也江之畔
怲怲睽隔積鬱鬱歲年換無計脫煩促轉坐迫茲蔓
再讀並舟篇愈切山陽嘆誦言各欽德悲離古所患
暮春逢林子邂逅殊邦念舊寫懷輒盡本韻

赤驥奮途路神龍厭池沼不登泰山頂豈見衆山小
明公昔際遇志與青雲杳爛承夕扉詔番苦司隸擾
君平實憤切軒然爭臣表朝野凜生氣樹鮮安巢鳥
名孤衆毀集竄薄憂心悄一投海濱郡遂守荒江眇
遼遼嶺南國借爾揭文旄中天行日月憂憂孤鶴矯

君雖關內產迹自閩中肇業從考亭入統爲橫渠紹
伊余放曠人漁潛侶荷蓀亡羊以多岐望洋徒浩漭
睽離歷十暑邂逅值春杪日談恨易夕夜坐忽及曉
苑花雖寂寂風絮尚嫋嫋回首通州別屈指日不少
今看兩白髮誰忍置清醪君行秉大軸吾歌入幽渺
林岑有夙愉烟蘿闌裊裊誠無王良顧空山沒驥褭

安南歌送許給事中天錫

芳阡藉文轂垂楊縮鳴珂使君且勿發聽我安南歌
安南古夷隩嶺嶮蔚陂坳炎原吼象兕溟窟底鼉鼉
爰自秦漢降憺怛尋干戈天皇操化樞環海無驚波
永執臣妾禮稽首心靡他珠犀走北陸翡翠供虞羅

王臣乘四驪駝駝金盤陀朝濟白藤江暮涉富良河
白日破蠻霧銅柱孤嵯峨雕題覩漢儀芭舞何傞傞
皇仁罄所宣紆征采民哦使君聆我詞慷慨不顧家
僕夫杖明鉞絳節拂林華樓船下烟淑鼓吹達海涯

空同集卷第十五

五言古詩四十四首

乙丑除夕追往憤五百字

北郡李夢陽撰

憶昔黉賓初皇疾輟臨仗維日白氣亘黑風復排踴
 俄傳天柱折忽若慈母喪帝本堯舜姿末履轉清伉
 斂衽接耆碩高出文景上兩宮悅孝子九廟歆流鬯
 毅然整六師霹靂無前向大羊遁朔漠鯨鯢蟄溟漲
 困冲不凝壽日表空殊相蜿蜿湖中龍一夕拔驚浪
 回首哭蒼梧魂斷湘南瘴念昨下明綸臣也誠無狀
 誓死叫閻闔伸頸甘礎盜梁竇勢如灼漢廷色惆悵

皇乃西園游召彼侍供張從容杯酒間似讓還非讓
未剖青鎖封已下金雞放臣某詎足惜統體關衰王
歷數古明辟聖節疇能尚逝欲碎臣骨顛帝不得延
攀髯眇莫及痛哭橋山葬玉光動前星朱符闡靈魄
主器難久虛勉起答羣望金木歛爲崇太白晝相抗
羯胡敢余侮吾徒盡乘障嗚呼榆臺役棄我六千壯
踉蹌戰士骨躡蹶將軍輶二豎固輕率腐屍亦云當
所恨國威辱北鄙氣悽愴鈺鼓疑皇情何以慰宸况
悽悽建未月臨門遣征將紉袴作元戎京軍本浮宕
翻使沿邊卒束手遭箠掠揭嶰雲中城誰復扼其吭
胡來風雨聲胡去橫拍唱千村與萬落人烟莽蕩蕩

嬰兒貫高槩志婦經衣衿狐狸叫破壘落日悄澹澹
此輩誠鼠竊反覆亦難量騏驥駕鹽車虛名縛骯髒
世豈乏頗牧賤或執鞭杖瑣瑣登壇子飽之則飛颺
吁此良太枉國慨何由暢水旱而秋雷陰陽迭驕亢
皇天雖至公視之但塊塊臣當歷服始謬進大夫行
退朝實憤切欲吐畏官謗武王秉黃鉞師事太公望
列聖構梁棟駕馭亦英匠先帝升遐日臨榻召三相

田居左生偕二李見過二首

習宦非我長官久計轉拙遭斥還田廬獲與初念協
樹藝良有期農事固堪悅飄飄綠原風鼎鼎明川月
披襟恣吾適既夏不知熱回思行役日寒暑靡得輟

踈懶古雖鄙任性亦可說膏疇矧豐蔚積潦復淒冽
白日皎在茲停雲靜如結爲謝二三子努力慰衰劣
去官今七暑漸與農務親隨宜諳土性言話羣野人
時或遡微風行歌響空榛先民邈何攀慨焉傷我辰
慨傷適誰知所有二三賓文論日往來炯炯高義伸
炎雨回衆姿涼飈起修眇兀然林木下日入忘歸輪
玄蟬夕益聒去鳥一何頻野行畏多露無使侵衣巾

城南別業夏集二首

田居本自娛况兼林水情聿茲暑衣晨而與佳士并
挈榼遡芊緜臨隄弄深情娟娟浴沙鷺交交鳴枝鶯

雖非岩潭區閒曠足我營菰蒲裊寒陰隕果時自驚
有室矧伊邇遐哉謝塵縈

二

荷鋤侈高詠濯纓肆佳吟疇知稼穡場乃爾蒹葭侵
步風逾曾堤徙筵趨重陰於情既有托矚寓良自深
逶迤波上雲征征草間禽隋臺信已古魏城方肇今
驗物果足遣杯乾聊復斟

慶都篇

於昭開帝則蕩蕩協欽文高辛初纘服大舜復升聞
瞻依太古日悵望春空雲緩策遵墟里翱翔誅放勳

帝乙

此以下三首皆爲 武宗大婚而作

帝乙歸元歲瀉汭降高秋白霧凌蒼壁文烟結綵樓
楓陌三公引雲衢六馬遊行當瞻月馭佇想詠河洲

黃衢二首

黃衢會日月紫氣懸陰陽冉冉神龍下英英朱鳳翔
蘭烟凝玉閣桂月滿金堂禮先歆九廟德已合無疆

二

桂宮新降馭蠶室爛生氣曳綈成漢業采葛相周文
會奉重輪日先瞻五色雲秋明天路夕瑞雨碧氤氳

十二月朔

積陰凌紫極玄霧暗三辰黃龍游帝時萬乘若浮雲

六蚪何蚴蟉雜沓走天神明王熙庶載至敬達郊禋
玉輦親牛豕重瞳注鹿羣精誠先百物咸德屆犧人
揚鑾回御道九宇冀陽春

夏歌

積潦溢廣澤炎雲翳崇臺玉階履綦絕紫殿生莓苔
螢流踈竹靜風動綵幃開佳期悵千里竟夕以徘徊

湘妃怨

采蘭湘北沚搴木澧南潏淥水含瑤彩微風託玉音
雲起蒼梧夕日落洞庭陰不知篁竹苦惟見淚斑深

春曲

萋萋百尺臺南臨大道開月明珠箔捲塵暗寶車來

豪雄五都俠意氣萬人摧帶醉穿林徑垂鞭拂閣梅
結客少年場行

燈如列宿行月似九秋霜番番七貴兒燦燦五侯郎
雜沓凌香陌徘徊競夕光各携萬金劍結客少年場
俠客行

幽并豪俠地燕趙稱悲歌千金市駿馬萬里向交河
公卿贈寶劍君王賜玉戈捐軀赴國難常令海不波
從軍行

棄家從上將報主掃胡戎怒滿常隨月旗翻數起風
右指昆邪盡左盼月支空馳名紫塞外開府玉關東
不逢百戰日誰識萬夫雄

出塞曲

單于寇邊城漢將列長營旌旗蔽山谷鉦鼓晝夜鳴
乘我浮雲騎殺我明月弓奇兵左右出長驅向雲中
彭彭陣結虎颯颯劍浮虹一戰臯蘭滅再戰沙漠空
歸來獻天子長揖不言功

銅雀伎

帷飄雀臺上絃奏舞衣前羣悲一以望春草爲誰妍
芳歲銷蘭怨流塵集錦筵爲問西陵道孰與漢家阡
漳津夕眺

揚舲亂北渚靡蓋望西陵帳殿牛羊下歌臺麋鹿升
日夕松栢路蕭蕭響風樹連沙改故浦空山沒蒼戍

徘徊望霸氣鄴城在何處

呂仙祠

孤遊逢呂跡永逝感盧生眷彼炊梁術契我遺世情
蒼山故國道落日邯鄲城陰陰祠宇夕宛宛曲池清
不見金芝侶誰聞朱鳳聲田鼉穴桂壁野葛蔓松楹
寧知往來者不是寐中行

三月河上宴集

觸霽邁芳垆修夜臨長洎雖非曲觴飲聊異秉簡戲
波延拾翠舸岸匝尋青騎羽爵戀馳景鸞蕭劇春思
羣評狎鳧鴈撫適懽同志亦以擴凡超流連豈吾事

詠樂溪

濯足荒溪口延望大江潄石樹環碧綵泉潭生翠陰
經亘涉清漣沿洄登素岑日暮樵響絕但聞山水音
鴻鴈遵渚飛麋鹿聚空林而子豈不樂其如兼善心

贈劉主事元瑞二首

駕舟越洪川飄風揚其波白日不可駐浮雲一何多
搴芳涉北沚采蠶陟南阿悵我平生友傷此欲如何

二

濛濛孤舟夕橫笛坐烟浦秋綠被汀沙落鴈不可數
烈調千行雲激商復流羽曲竟和者誰佳人淚如雨

湘江吟

對酒歌綠倚歲宴懷佳人山寒翠袖薄微霰沾衣巾

空持紫鸞簫欲致愁無因日暮湘江曲浩蕩烟波春
春曲五首

維南有曾城下瞰梁上臺雄構翳雲日歌鐘暮徘徊
芳草徧舊畿山川邈悠哉

二

春城花烟滿杳靄生夕陰白馬繫芳樹繡袿彈鳴琴
擣蒲少年子一擲千黃金

三

綺閣俯通闌後有百尺樓並坐紫羅茵雙引青玉甌
揚花起薄暮糝糝縈芳洲

四

菁菁艷陽月鬱鬱美人思游絲罥白日炯若春風姿
零落垂手舞空傳白紵詞

五

借問美人居云住城東隅背有桃李館前臨車馬衢
十三妙歌舞十五冠名姝

朔日

朔日悲風起空除落葉平猶聞砧杵急已復剪刀鳴
一夜傳霜箭黃雲滿塞城

槿樹

槿樹依空砌寒時尚着花未能堪暮色徒自絢朝霞
寄語閨中女無多鏡裏華

權園

權園秋氣夕唧唧寒螿聚風回啼欲斷月落歸何處
爰悲在堂吟復詠山樞句感爾中夜興微霜下庭樹
春情

俗縈一何繇駕言春已分綠郊鮮行輪朱樹花將紛
鳴鴈起前墟浮陽藹東瀆徙倚孤臺側佇迴送征雲
遊寺

褊心儔輩寡幽境每苔步繇鬱倚磴歇馮孤眺迥屢
洞塔陰古宇芬蘿裊澄樹佇觀野禽哺此外豈吾慮
昇天行

市居苦煩溽陸暑懷清波緬思溪壑側丹崖卷曾阿
仙人桂樹下窈窕攀青蘿我獨塵歎內營營欲如何
春游篇

古臺悲帝子歌吹餘春秋草綠夷梁野雲浮河海流
擊壺詠四澤鼓鐘眺三洲板條已無那駕言誰倦游
四清篇

盤松屹當戶修筠靜依檻羈遠桐絲澁蕭瑟鶴思減
歸傷園塢廢坐令荒穢斬彈曲憇踈蔭臯唳清露湛
正德四年七夕上方寺作

逸人厭囂俗達士樂閒勝乃茲城中林而非車馬徑
積雨豁新霽雲石掩秋映微陽下孤塔潦水夾明鏡
已疑塵寰隔况覩蓮方淨豈惟慕真覺亦以叩銓證

玄蟬共西夕浮雲本無定

戊寅早春上方寺

逾年罔涉茲過之門巷疑匪畏霜露辰肯與春事期
徑蘭芊故叢苑松發新蕤陟丘念廢居升危眺回漪
抱以幽曠豁情緣悽愴移驚風迺虛塔振振空廊悲
得遣復安較勞生良爾喚

夕集上方寺辛巳春

晨飈奮以厲夕林回晏溫郊遊悵伊阻駕言乃松門
春湖靜瑤宇塔蘿裊清樽遙睇被原草近蹇臨水蓀
花雨時自落法雲凝復奔淹留遲寶月破此人徑昏

山中

山中雨乍歇一夜瑤草長風吹翠岩竹下應石瀨響
時來展書坐悠悠絕塵想

置薪

讀書古木陰置薪倚其根露零石徑滑雲起溪日昏
白虎啓巍觀金馬開高門君自薄簪紱難稱國未恩

九潭詩

岩岩千仞嶺下有百尺潭夕風起微瀾洑洑動晴嵐
俯之鑿我心佇翫雲波涵流蕤颺寒清躍魚手可探
蹊暝樵響歇猿鳥來相叅寄語泥中物長蟠恐未堪

空同集卷第十五

空同集卷第十六
九
中雨主揭一外紅草身風如斐出許可蕙以賊
書坐郊郊縣聖懸
此
人徑昏
長臨水蓀
雲味奚日吞
未思

空同集卷第十六

五言古詩四十三首

北郡李夢陽撰

登東城樓晚下樓作贈同遊數子二首

登高散涼目隕然日云暮逃暑良已厭戀景復延顧
廣野起暝色層闌合昏霧眷言樓中客共此城上步
蚊虫撲面游蝙蝠時自度二儀但莽莽一氣黯迴互
晝夜本定理明晦非難悟日入各言息鐘鳴復馳騫
嶺翠宋帝閣突兀信陵墓往似宿沙禽來如綴花露
徙倚千仞梯長謠發悲悰

盛陽麗樓臺爛如錦繡錯日入暝煙起俯視但冥漠
卽此悟人理天道固可度動靜啓晦明代謝有今昨
涼飈逐夕興迴聲滿虛閣四顧水明滅宿鳥喧相索
啞啞啼城烏噉噉上雲鶴怛怛感晨暮徙倚罷觴酌
北斗忽復低西月隱長薄閃爍海光動翕沓氛霧廓
無恃黑頭在早定滄洲約

寄贈端溪子二首

嘆鳳世已遠悲麟竟何爲蘭蕙秘幽巖蕭艾盈路岐
君子抱明德傷也誰復知隨流非我心特立乃見疑
亭亭南山松匪無霜霰摧寒蕤但不改孤貞常自持

二

智者尚高契達人慕希聲曠世有相感同時悵難并
烈風起玄朔百卉忽以零登高望所思慨焉念徂征
鴻鴈序翅飛麋鹿呦呦鳴爲言明馨子盍簪終有成

贈蒼谷子

玄雲翳白日積陰何漫漫風氣日以淒泥雨常不乾
漂籜委川塗百卉良可嘆覽物懷伊人撫時悲涼寒
憂來如亂絲理之棼無端爲霜念逝鵠多露怨芳蘭
所嗟聲影隔匪懼馨香殘徒把瑤華音長謠望林巒

贈青石子二首

高鳥有違羣離獸多悲音懿彼婉孌子悵焉分此襟
朝發南河隅夕暮乃北岑玄雲旣無極黃波浩且深

君其四海翔無言還舊林

二

季秋凋羣木寒潦濫中軌笳鼓濟方舟軒車匝河涘
攀德惜遙邁悵分睇馳晷采蘭徒情結把菊爲誰美
願子厚衣襦霜路自茲始

贈劉潛

人生無常因飄如風中雲昔別大江隅今也長江濱
涼飈起霜夕隕葉何紛紛我菊有佳色毅然獨芳芬
遲速良有時勉哉樹高勳

贈崔子

鯤魚游北溟鳳鳥翔南涯扶搖非無運鳴世自有期

顯夫競鐘鼎遁士潛蒿藜駟馬豈不榮泉石安且怡
悠悠西山人匪爲薇蕨飢寄言青雲客策勳及今茲

贈孫生

古人種桃李不爲蹇其花君子振英芬豈在文與華
炎陽赫晴彩百卉流丹霞蕢彼東園實纍纍一何嘉
采者自成蹊舉世徒咨嗟

贈王生二首

鳳鳥世希有衆人常見疑一朝下西周憂焉鳴高岐
光彩照四極觀者驚以咨神物耻自衒卑鄙甘見欺
驥馬匪伯樂鹽車空號悲燁燁豐城劍非華誰固知

二

伯牙違鐘期有琴不復彈茲意奚以取良爲知音難
得失有榮枯合離成怨懽黃鵠戾天雲玄鴻漸河干
淺夫貴多矜狹士賤自殘幸子固明志顯塞察所安

贈崔生

伊昔振我衣連步千仞岡巖谷窈疑阻岐徑回羊腸
與者咸莫從子也乃同行舉手撼天樞縱目攬大洋
星斗何歷歷海波浩茫茫登山貴及顛涉水非無航
願言窮高深念哉毋相忘

贈魏子二首

霖潦久迺歇晨興送還輶野寒泥淖盛念茲途路修
人生苟相許豈必曾綢繆踟躕東路岐贈子雙吳鉤

二

八月浙潮滿念子鼓南楫海月團會峯山風下江葉
里間多宴娛仕宦有榮業早回北向轅晝日望三接

三士篇贈鑿李鄭張

巖飈厲時威稿葉下榮木春風一以敷病草奄回綠
天道豈常肅人事有還復七情旣吾賊六淫乃爲殞
農經發玄旨軒問擴英馥代殊理易昧行乖計相逐
陳芟抱縣息寒根蘊真育李生起專門鄭子振容谷
張也剖金匱奏効更神速飲橘祗自銜種杏亦可惡
誦我三士篇聊以助清穆

寺游別熊子四首

天地固常爾遇之情不同但看搖夏樹何似飛秋蓬
古來怨離人豈必窮與通默默兩無語坐披琳殿風

二

夕風起涼閣入耳松撼撼當此佳勝區誰忍遽離析
簷鸛戛戛鳴蘿翠滿衣席異時冠蓋場倘憶幽賞跡

三

散眸七竇地觴爾孤雲臺一望碧雲合四面清風來
流影盪我前炎樹生秋哀一笑問天地劫灰安在哉

四

獨立臺上閣俯茲城下湖爲問黃金魚涇尺今有無
愚者人盡笑賢之乃謗誣二者吾適從不如乘海桴

甲申中秋寄陽明子

風林秋色靜獨坐上清月春茲千里共眇焉望吳越
窈窕陽明洞律兀芙蓉闕可望不可卽江濤滾山雪

贈李世德

豢畜不生麟鸞穴無鷗鷺求水貴求源佳木無惡條
李門世清修三輩燁雄超黃扉早殺翮中葉乃淪凋
生也困逾勵奮飛竟雲霄大鈞幹神化萬物隨生消
英英畹中蕙化爲艾與蕭願堅謀始心全我金石要

寄贈玉溪子

松檜不棲蟬熊皮不上蟻秉性死不易斯足驗人理
苟投信若飴義交固如水如水遐則思若飴背乃毀

悠悠徂暑月眷眷念君子霍雲停復飛汾水蕩而駛
山西迴夕陽皎如靚光美徒操孤絕絃嘆息竟何以

初秋上方寺別鄭生

勝地亮常爾佳士難屢并未窮結駟游遽復揚帆行
古林鬱城隅石門敞幽清赴風選濃蔭布席觴羣英
竹涼時自來殘暑驕未平戒飲今二暮爲子杯一傾
義投不在故跡遠心自縈念茲徘徊意時哉樹嘉名

贈鄭生三首

杪秋木葉脫霜露告成歲驅車遡寒郊觸物念征邁
戒舟有程日維駒阻心愛所幸旦暮留前途或風瀨

二

伊予解組歸汝也美少年駿馬臂兩弓射獵梁王川
感子重意氣授之黃金鞭萬里不易致悲鳴爲誰前

三

英英百尋木時至乃黃落楚楚青俊郎還家髮蕭索
桂樹寒正榮溪魚白而躍山行采瑤草寄我長生藥

寄程生

河日淡莽莽飄風但塵沙陰陽爲誰爭時至枯亦葩
念離傷歲窮懷音怨途賒彼美杳何許孤吟弄瑤華
夜攬海門月晨吸波上霞苦心誰固知延望長自嗟
浦鴈回故翼汀蘭茁新芽無負汴上約梁園多竒花

贈梅國子

烈士有心許佳人重情歡投義既不易識者良獨難
清秋理瑤瑟爲君發高彈一曲未云亂仰視孤鴻翻
一舉狹千里再舉青雲端我欲從之逝羽短才力單
聲影中藏之儻接排風翰

贈定齋子

水澄萬形一鏡明別醜好哲人靜以俟愚者苦紛擾
君本觀海人揚旆向東道高步登岱嶺橫覽盡洲島
匪云波水浩眈見衆山小孔林秋飈入漂籜委寒草
明禋展躬謁蕪翳爲消掃

雨後往視田園同田熊二子二首

鳥性悅儔匹人情豈無慕亟見不云數獨行必相呼

去昨有城上眺今復郭南步膏雨回原綠豐林宿殘
霧久蕪慨我廬旱水兩妨誤夏禾既岑漠秋秫庶能
穫釀具粗已足念子有長路

二

雨暎自有期歲功詎云差昨來偶滂沱萬物皆顏華
晴晨子見過毅然巾我車荒徑蹄轍稀澤國踈桑麻
長風起修林夕響連兼葭芄芄南山豆離離東陵瓜
懷古看行雲矯首徒咨嗟

庄上晚歸車阻于潦渠徒步始達干岸

暮醉各言歸風起草獵獵潢潦溢中軌車至不可涉
野黑徑復曲魚貫踵相躡良懼蒼耳窟重爲蜥蜴怯

童稚行我先溝塍負而躡世路本夷嶽人情有驚怙
閒素輕波濤臨川想維楫履坦合自咎長吟詠匏葉

山夜

孤月上東岫白鶴激秋唳涼風振溪壑林影颺搖洩
山居本深靜夜氣復澄霽冥心向千古眇焉託真契

蒸熱三子過我東庄

林蠲午不歇日毒土色赤鬱言森密裡時華媚深碧

三人者胡來無乃不速客黃公蒼鬚髮再生鄭生作程生誥

頽而暫入蔭齊解帶對酒各岸幘籬萱挺其秀檻果

垂易摘無言豈爲默有形忘所役杯乾時一斟遽復

至西夕

田園雜詩五首

朝陽暖秋木凝露未卽晞翩翩啄榴鶯自驚集復飛
衆穡既登載我事亦漸稀晨興坐東牖兀然對紅薇
噉噉一白鶴北逝將疇依忍茲稻梁辰而汝甘長饑

二

大車行棘棘小車響額仄隨分各有營急者稼與穡
旦出在田野日出未遑息長陰下西夕蕭颯起寒色
雲霞變彩氣照我桑麻國立看勞者歸露濡徑不濕

三

野清雲氣滿塲功亦云畢收穫雖有殊大小各盈室
感茲狼戾年追念憂苦日紛然噲其饁妻子孰遑佚

歲工借寒熱人事坐勞逸蕭蕭原野霜何草不垂實

四

壯時掉塵鞅老乃卽農務值茲田事終怛然感霜露
原萋日以斂林華不守故嚴霜淨游氣翔鵠在天路
鷄雀躍蓬蒿啄食不滿嗉而予竟何言飯牛髮今素

五

田居亦安娛患者寡朋仇農談或時歇仰視蒼雲流
青衿者誰子道言卽我謀開尊面圃場剥棗充盤羞
物小意固勤觴既情仍留晶晶遠天色秋暘下林丘

秋詩二首

百卉淒以腓游行散我矚夕風一何瑟入園乃華馥

菊也紛其英修篁積寒綠人生匪金鐵榮落譬草木
磬折者誰子誓死日爭逐賢貴與賤愚滅去孰還復
鳥雀各有安無爲智者辱

二

北風胡鴈急小禽亦南飛輕俠羣少年求伺爭有爲
戈彈無遺木畢施在中達百發不一獲用心良足嗤
黃雀墮計中鳴吡如得依白鵠舉雲漢覽之心內悲
小大有分量瑣瑣豈知微

詠鷺

天風下厲霜海色清嚴冬朱鳥逝去遠玄禽眇焉踪
翩翩委波羽鳴飛何雍雍去若雪球散來疑玉梭從

回旋淥蒲漪映照青蓮峯戲澤不染潔浴湜轉丰茸
羣起若避驚孤立如有慵孔言崇九思周歌羨斯容
我客亮多憚君子良冲融亦應懼鳧鴈幸公處鴻寶
保爾貞素姿倘附春濤龍

空同集卷第十六

